

खास-खास खबरां:-

- प्रधानमंत्री नरेन्द्र मोदी होरें आखेया ऐ जे हून "मेड इन इंडिया" उत्पादें पर अमरीका दा टेरिफ घटियै 18 फीसद होई जाग।
- बजट सत्र दी शुरुआत दे मौके पर राष्ट्रपति हुंदे अभिभाषण पर धन्नवाद प्रस्ताव पर चर्चा अज्ज बी दौनें सदनें च जारी रहौग।
- राष्ट्रपति द्रौपदी मुरमू होर अज्ज अपने गृह राज्य ओडिशा च जाजपुर च मां बिरजा मंदर जागंन।
- सरकारै समेयान सरबंधी नियम 2026 अधिसूचित कीते न।
- डब्ल्यू.पी.एल क्रिकेट च अज्ज वडोदरा च गुजरात Giants दा मुकाबला दिल्ली कैपिटल्स कन्नै होग।

<><><><><><>

### PM Modi –US Prez

प्रधानमंत्री नरेन्द्र मोदी होरें आखेया ऐ जे हुन मेड इन इंडिया उत्पादें पर अमरीका दा टेरिफ घटिए 18 प्रतिशत होई जाग। उने अमरीका दे राष्ट्रपति डोनाल्ड ट्रंप हुन्दे कन्नै ग्ललबात मगरा सोशल मीडिया पोस्ट च एहू घोषणा कीती। प्रधानमंत्री होरें आखेया जे उनदा अपने प्रिय मित्र राष्ट्रपति ट्रंप हुन्दे कन्नै गल्ल करना बडा गै सुखद रेआ। उनें आखेया जे जिसलै दुनिया दी दो बड्डी अर्थबवस्था ते दो बड्ढे लोकतंत्र मिलिए कम्म करदे न तां इसदे कन्नै जनता गी लाहू हुन्दा ऐ। ते आपसी लाहू दे बेशुमार मौके पैदा हुन्दे न। प्रधानमंत्री होरें इस घोषणा आस्तै भारत दी इक अरब चालीस करोड जनता दी तरफा राष्ट्रपति ट्रंप हुन्दे प्रति आभार जाहिर कीता। प्रधानमंत्री होरें आखेया जे राष्ट्रपति ट्रंप हुन्दी अगुवाई वैश्विक शांति, स्थिरता ते समृद्धि आस्तै महत्वपूर्ण ऐ। उनें आखेया जे भारत ट्रंप हुंदे शांति जतने दा पूरा समर्थन करदा ऐ। प्रधानमंत्री होरें आखेया जे ओहू दपक्खी भागीदारी गी अभूतपूर्व ऊंचाई पर लेई जाने आस्तै राष्ट्रपति ट्रंप हुन्दे कन्नै कम्म करने लेई उत्सुक न।

<><><><><><>

### India Us Trade Deal Ministers

केंद्रीय मंत्री अमित शाह, डॉ. एस. जयशंकर, अश्विनी वैष्णव, पीयूष गोयल ते किरिन रिजिजू होरें अमरीका कन्नै व्यापार समझौते आस्तै प्रधानमंत्री नरेन्द्र मोदी, अमरीका दे राष्ट्रपति डॉनल्ड ट्रंप ते दोनें देशें दे नागरिकें गी बधाई दिती ऐ। गृह मंत्री अमित शाह होरें इस्सी भारत-अमरीका संबंधें आस्तै महत्वपूर्ण दिन दस्सेआ। उने आखेया जे टेरिफ घटने कन्नै दोनें देशें बश्कार व्यापार संबंधें ते आपसी विकास च तेजी आग। उने आखेया जे इसदे कन्नै भारत-अमरीका रणनीतिक सांझेदारी गी होर मता बल थ्होग। विदेश मंत्री डॉ. एस. जयशंकर होरें आखेया जे इस समझौते कन्नै दोनें देशें आस्तै रोजगार दे मौके बढडन, विकास गी गति ते नवाचार गी बढ़ावा थ्होग। उने आखेया जे इस समझौते कन्नै 'मेक इन इंडिया' जतनें गी मजबूती थ्होग। उद्योग ते व्योपार मंत्री पीयूष गोयल होरें आखेया जे एहू व्यापार समझौता साझा समृद्धि आस्तै मिलिए कम्म करने आह्ले दो इक्के नेई विचारधारा ते निरपक्व व्यापार करने आह्ले लोकतांत्रिक देशें दी शक्ति दा प्रतीक ऐ। गोयल होरें आखेया जे एहू छडा इक व्यापार समझौता नेई ऐ सगुआ एहू इक ऐतिहासिक मोड ऐ जेडा भारत-अमरीका संबंधें गी नमा आकार देग ते बरे 2047 तक विकसित भारत दे लक्ष्य गी गति देगा। सूचना ते प्रसारण मंत्री अश्विनी वैष्णव होरें इस्सी आपसी लाहू दा सौदा दस्सेआ। सोशल मीडिया पोस्ट च श्री वैष्णव होरे आखेया जे भारत ते अमरीका कश शांति ते विकास आस्तै मिलिए कम्म करने दी अपार क्षमता ऐ।



## US Ambassador

अमरीका च भारत दे राजदूत विनय मोहन क्वात्रा होरें आक्खेआ ऐ जे प्रधानमंत्री नरेंद्र मोदी ते राष्ट्रपति डॉनल्ड ट्रम्प हुन्दी अगुवाई च भारत-अमरीका व्यापार समझौता दोनं देशें आस्तै बड्डी जीत ऐ। उने सोशल मीडिया पोस्ट च आक्खेआ जे इसदे कन्नै दोनं देशें दी अर्थव्यवस्थाएं ते ओदे लोकें आस्तै व्यापक मौके पैदा होइना। क्वात्रा होरे आक्खेआ जे एह घोषणा भारत-अमरीका सांझेदारी बश्कार नमें दौर दी शुरुआत ऐ।



## Discussion

लोकसभा ते राज्यसभा च राष्ट्रपति द्रौपदी मुर्मू हुन्दे अभिभाषण पर धन्यवाद प्रस्ताव कल चर्चा शुरु होई ही। अज्ज बी राष्ट्रपति हुन्दे अभिभाषण पर चर्चा होग। लोक सभा च चर्चा लेई कुल 18 घंटे तय कीते गेदे ना। राज्यसभा च बी कल चर्चा शुरु होई ही ते चर्चा आस्तै 16 घंटे तय कीते गए ना।



## Prez Visit

राष्ट्रपति द्रौपदी मुर्मू होर ओडिशा दे 6एं दिनें दे दौरे पर ना। राष्ट्रपति होर अज्ज अपने गृह राज्य ओडिशा च जाजपुर च मां बिरजा मंदर जाइना। राष्ट्रपति हुन्दे कार्यक्रम गी दिक्खदे होई मंदर दे आले दोआले सुरक्षा दे व्यापक इन्तजाम कीते गेदे ना। एदे अलावा राष्ट्रपति हुन्दा बालासोर च फकीर मोहन युनिवर्सिटी दे दीक्षांत समारोह च शामिल होने ते एहदे नमें बनाए गेदे ऑडीटोरियम दा उदघाटन करने दा बी कार्यक्रम ऐ। 4 फरवरी गी राष्ट्रपति होर रायरंगपुर दे महलडीहा स्थित कुड़ियें दे सरकारी हायर सैकेंड्री स्कूल च भंजबीर सुनाराम सोरेन हुंदी मूर्ति परा पडदा गोआडगंन ते बच्चियें कन्नै गल्लबात बी करगंन। राष्ट्रपति हुंदा सरकारी आयुर्वेदिक मैडिकल कालेज ते अस्पताल- ओडिशा एग्रीकल्चर ते टैक्रॉलोजी युनिवर्सिटी- तीरंदाजी केन्द्र ते शैहरा दे पानी दी निकासी सरबन्धी बक्ख-बक्ख परियोजनाएं दा उदघाटन जां नीह पत्थर रखने दा बी कार्यक्रम ऐ। इस महीने दी 6 तरीक गी राष्ट्रपति मुर्मू होर सिमलीपाल च आदिवासी महिलायें ते नौजवानें कन्नै गल्लबात करगंन। 7 फरवरी गी उन्दा छत्तीसगढ़ दे जगदलपुर च बस्तर पांडुम 2026 महोत्सव दा उदघाटन करने दा बी कार्यक्रम ऐ।



## Finance Baggage Rules

सरकार नै समेयान संरबन्धी नियम, 2026 अधिसूचित कीते ना। केंद्र नै नमे सीमा शुल्क सामान (घोषणा एवं प्रसंस्करण) विनियम, 2026 ते इक मास्टर सर्कुलर बी जारी कीता। वित्त मंत्रालय नै आक्खेआ जे इने नियमें कन्नै प्रक्रिया सौखी होग, पारदर्शिता बढग, इलेक्ट्रॉनिक ते अग्रिम घोषणा संभव होइना ते सुगम निकासी यकीनी बनग। मंत्रालय नै आक्खेआ ऐ जे एह उपा अंतरराष्ट्रीय यात्रियें आस्तै सुगम ते संशोधित प्रावधानें गी दर्शान्दा ऐ ते नमी आर्थिक स्थितियें ते यात्रियें दी आसैं-तांगें मूजब ऐ।



## BJP- Mamta

भारतीय जनता पार्टी नै नमीं दिल्ली च पच्छिम बंगाल दी मुख् मंत्री ममता बनर्जी हुन्दी मुख् चुना आयुक्त ज्ञानेश कुमार हुन्दे कन्नै मलाटी दी निन्देआ कीती ऐ। पार्टी दे प्रदेश अध्यक्ष शामिक भट्टाचार्य होरें सोशल मीडिया पोस्ट च आक्खेआ 12 राज्यें च खास गहन पुनरीक्षण- एस.आई.आर दी प्रक्रिया जारी ऐ, पर कुसै होर मुख्मंत्री नै निर्वाचन आयुक्त हुन्दे कन्नै इस चाल्ली मलाटी नेई कीती। भट्टाचार्य होरें आक्खेआ जे ममता बनर्जी डरी दियां ना। भाजपा नै ममता बनर्जी हुन्दे इस आरोप गी बी खारिज करी दिता जे दिल्ली पुलिस नै बंगभवन गी घेरिए अपने अधिकार क्षेत्र सोयां बाहर जाइयै तलाशी लैती। विपक्ष दे नेता सुबेंदु अधिकारी होरें कोलकाता च पत्रकारें गी दस्सेआ जे दिल्ली पुलिस दी कार्रवाई पर्याप्त जानकारी पर आधारित ही।



## Special Train Katra and Jammu

वैष्णो देवी कटरा ते श्रीनगर च खराब मौसम करी शिडक ते हवाई यातायात बंद ऐ। इस दौरान, यात्रियों दी भारी भीड़ गी दिखदे होई, रेलवे दे अधिकारियों फंसे दे यात्रियों दी सुविधा आस्तै खासा आरक्षित रेलगाड़ियों दे संचालन दी इजाजत दिती ऐ। कटरा ते श्रीनगर बश्कार अज्ज ते कल चार विशेष रेलगाड़ियां चलगंन, जेड़ियां बनिहाल च रुकगंन। एह फैसला क्षेत्र च नियमित परिवहन सेवाएं च रुकावट करी प्रभावित यात्रियों दी सुरक्षित, सुगम ते सुविधाजनक यात्रा यकीनी करने आस्तै लैता गेआ ऐ। रेलवे अधिकारियों यात्रियों गी सलाह दिती ऐ जे ओहू आरक्षण दी स्थिति ते ट्रेन दे समें दी पैहले सोयां जांच करी लैन कि जे इस दौरान यात्रियों दी मंग मती रौहने दी मेद ऐ। यात्री आधिकारिक रेलवे वेबसाइट, हेल्पलाइन नंबर 139 या राष्ट्रीय ट्रेन पूछताछ प्रणाली राएं मती जानकारी हासिल करी सकदे ना।



## Def. Delegation Armenia

प्रमुख रक्षा अध्यक्ष जनरल अनिल चौहान हुंदी अगुआई च इक रक्षा प्रतिनिधिमंडल 4-रोजा अधिकारिक दौरे पर आर्मेनिया पुज्जा। इस दौरे दा मकसद दोनें मुखें बश्कार रक्षा ते सुरक्षा सहयोग गी मजबूत करना ऐ। एह सांझा सामरिक हितें गी अगगे बदाने ते दौनें मुखें बश्कार लम्मी अवधि आहले रक्षा ते सुरक्षा सहयोग गी मजबूत करने दी दिशा च इक महत्वपूर्ण गैं ऐ।



## Kerala Education Minister

केरल दे शिक्षा मंत्री वी. शिवनकुट्टी होरें आरोप लाया जे सुन्ने दी तस्करी करने आहले कांग्रेस नेता सोनिया गांधी हुंदे कन्नै मिलने गी गेदे हे। उनें केरल विधान सभा च सबरीमला स्वर्ण मामले दा जिक्र करदे होई दोष लाया। इस दौरान कोल्लन दी सतर्कता अदालतै सबरीमाला स्वर्ण मामले च साबका सबरीमला कार्यकारी अधिकारी सुधीश कुमार गी जमानत देई दिती ऐ।



## Balochistan Civilians Killings

पाकिस्तान दे इक मशहूर मनुक्खी अधिकारें सरबंधी संगठन नै बलोचिस्तान दे नुश्की जिले च कैडेट कालेज कश इक यात्री गड्डी पर पाकिस्तानी सुरक्षाबलें आसेया कीती गेदी गोलीबारी च घट्टोघट्ट 10 आम नागरिकें दे मारे जाने दी खबर दिती ऐ। हमले दी निंदेया करदे होई बलूच वॉयस फॉर जस्टिस नै आखेया ऐ जे नहत्ये लोकें पर इस चाल्ली कन्नै हमले करना गैर मनुक्खी ते गैर-कनूनी हरकत ऐ- जेहड़ी मनुक्खी अधिकारें दी सरासर खलाफवर्जी ऐ। संगठन दा आखना ऐ जे पाकिस्तानी फौज दी जारी इस चाल्ली दी हिंसा कन्नै समूलचे बलोचिस्तान च डर ते असुरक्षा आहला माहौल पैदा होई गेदा ऐ। तोंआई बलोचिस्तान दी मनुक्खी अधिकारें सरबंधी परिषद नै बी कल आखेया हा जे पिच्छले बरे प्रांतै च पाकिस्तानी सुरक्षाबलें दी कारवाई च 598 लोक मारे जाई चुके देन।



## Cricket WPL

महिला प्रीमियर लीग क्रिकेटर च अज्ज बडोदरा च गुजरात जायंटस दा मकाबला डेलही कैपिटल्स कन्नै होग। एह मैच शामी साड्डे सत्त बजे शुरु होग- जेहड़ा जेत्तु वीरवारें होने आहले फाईनल मकाबले च रॉयल चैलेंजर्स बैंगलुरु कन्नै खेडोग। स्मृति मंधाना दी कप्तानी च RCB-लीग मकाबले च सबभनें शा अब्बल रौहने कारण पैहले गै फाईनल च पुज्जी चुकी दी ऐ। एहदे शा पैहले जेमिमा रोड्रिग दी अगुआई च दिल्ली कैपिटल्स नै अतरु ऐतवारें खेड्डे गेदे खीरी लीग मैच च यू.पी. वारियर्स गी 5 विकेटें कन्नै रहाया हा। हून इलिमिनेटर राउंड च अज्ज ओहदा मकाबला गुजरात जायंटस कन्नै होग।

